

Den boletin di abogadonan

Henny Eman ta satisfecho cu decision di Corte di apelacion

ORANJESTAD (AAN): Esaki ta un boletin di prensa, cu Diamars anochi e oficina di Abogadonan Rudi Oomen y Johan Sjiem Fat a entrega na DIARIO, riba peticion di nan cliente Henny Eman.

“Nos kier duna e siguiente declaracion en conexcion cu e decision di Corte di Apelacion Comun di Justicia de Antiyas y Aruba di Diamars den e caso di e bezwaarschrift di senior Eman contra e dagvaarding di Ministerio Publico den e caso di Fondo Desaroyo Nobo.

E dagvaarding ta contene 6 punto, di cual punto 2 te cu 6 ta consisti di acusacionnan di irregularidadnan cu supuestamente a worde cometi rond di dunamento di trabaonan na cierto contratistanan pa e proyecto FDN. Punto 1 di e dagvaarding ta contene e acusacion cu fondonan di gobierno pa e proyecto FDN a worde paga sin cu nan tabata debidamente presupuesta, manera e Ley di Contabilidad ta rekeri.

Pa loke ta e

irregularidadnan rond di dunamento di trabaonan na cierto contratistanan (punto 2 te cu 6 di e dagvaarding) Corte di Apelacion a dicidi cu no tin suficiente indicacion cu Sr Eman tabata involvi den esey y pa e motibo ey e persecucion di Sr Eman door di Ministerio Publico pa e delitonan aki no por sigui.

Pa loke ta e asunto di presupuesto bao di punto 1 di e dagvaarding, Corte di Apelacion a dicidi cu den cuadro di un bezwaarschriftprocedure no

tin suficiente espacio y oportunidad pa investiga si e defensa di Sr Eman mester worde honra. Esey ta entre otro pasobra ta trata aki di un asunto legal hopi complica cu ta relata na e Ley di Contabilidad y e articulonnan denCodigo Penal cu a worde introduci na 1999 al respecto. Ademá tin consehonan cu puntonan di vista completamente opuesto di instancianan di gobierno over di e materia aki y no por huzga e consehonan aki debidamente den un bezwaarschriftprocedure.

Pesey Corte di Apelacion ta haya cu e punto aki mester worde evalua y dicidi door di Corte den Promer Instancia den e asina yama bodemzaak.

Segun Abogadonan, Henny Eman ta sumamente satisfecho cu e decision di Corte di Apelacion. El ta particularmente contento cu e dudanan cu por tabatin over di su integridad door di e decision di Ministerio Publico pa persigui e pa supuesto irregularidadnan den dunamento di trabaonan na varios contratista, a worde bari for di mesa door di e decision di Corte di Apelacion y e hecho cu e no por worde persigui mas pa e delitonan aki.

Pa loke ta e asunto di presupuesto cu ta resta bao di punto 1 di e dagvaarding, loke ta mas bien un discusion academico over di e interpretacion corecto di cierto articulonnan den ley. Sr Eman tin tur confianza cu esaki lo worde evalua debidamente den e asina yama bodemzaak door di Corte den Promer Instancia, ya cu Sr Eman ta convenci cu e no a actua contra e Ley di Contabilidad ni contra e articulonnan denCodigo Penal.